



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tir_yimyim

yt tir yimyim

TAPAK 7

Ceasefire takok angutsü atema US-i
Israel azüoktsüla: CM Omar

Myanmar: Min Aung Hlaing tir
atema tenangzüktepba agiogo



VOL. XXIII ISSUE NO. 177 (ADOK 177) DIMAPUR KÜPTOKNÜ (SATURDAY) RONGCHII (APRIL) 11, 2026 ₹ 5.00

Kohima nung Deputy Commissioners Conference 2026 amunger

Dimapur, April 10, 2026 (TYO): April 10, 2026 nungi Civil Secretariat Conference Hall, Kohima nung Deputy Commissioners Conference 2026 tenzükogo.

Iba sentong nung Chief Minister, Dr. Neiphiu Rio-i okila jembidang Deputy Commissioner temi sorkar ketdangsubaren nung teyakyakba inyaktsü ajungshi.

Deputy Commissioner maparen tuluba kümogo aser item rongnung Centrally Sponsored Schemes, disaster management, grievance redressal aser department balala tsüingda amalitepa inyakbatem lir ta CM Dr. Rio-i ashi.

"Tanü sorkar ketdangsuba yimya melenshiogo aser ibaji citizen centric, technology driven aser outcome oriented kümogo. Anungji ketdangsurtemi law and order mapa inyakba den külemi development administration ajungketsüla kechiyong sorkar ketdangsubaren akangtsü atema maparen anaprong ya kasa tongtipang lir" ta paisa metetdaksü.

State sorkari Group-C mapatem nung nübo shitak shimoktsü atema Nagaland Staff Selection Board (NSSB) tentetogo aser Chief Minister's Micro Finance amala maparen

ajanga nübortem yaritsü meranger ta Rio-i ashi.

Skilling aser Workforce development atema Nagaland Skill and Entrepreneurship Development Mission ajanga tongti shilem agir aser iba nung construction, hospitality, transport, aser IT enabled services nung teyari agütsür ta paisa ashi.

Sorkari job fairs aser partnerships ajanga skills nung temulung agüja mapa agütsür. February 2026 tashi nung Live Register nung applicants 73,000 tema lir aser Nagaland Japan Connect 2026 o State wide Mega Job Fair sentongtem ajanga mapa agütsütsü meranger ta CM Dr. Rio-i metetdaksü.

Nagaland Japan Connect 2026 initiative kübok lanur 450 tema register süa lir aser candidate 65 bo mapa inyaktsü jaokogo ta paisa shisem.

Dr. Rio-i health sector indang jembidang COVID-19 mapang Medical Officers aser Junior Specialists nisung 83 mapa nung aniok aser parnok tang tashi inyakdar ta ashi.

Nagaland Medical Council kübok registered doctors 1,553 lir saka COVID recruitment nung parnok 193-i dang application agüja liasü. Iba ajanga nübo aser

public service nung shilem agiba meputeper ta paisa ashi.

16th Finance Commission indang recommendations sülen Nagaland senotsü jenjang asoshi tebilemstü ajurua lir. Central taxes nung Nagaland tajemba lemozüker aser 2026-31 period atema Revenue Deficit Grants maliba ajanga tayongzükba tulu ajurua lir ta CM Dr. Rio-isa metetdaksü.

Nagaland sorkar ketdangsubaren nung Tribal Councils ya tongti shilem ka lir aser iba ya 16-Point Agreement nung lateta aliba nung amendaka lir. Village Councils den külemi item sobaliba rejutemi ketdangsubaren nung tongtipang shilem agir ta paisa ashi.

State sorkari September 2024 nung Register of Indigenous Inhabitants of Nagaland (RIIN) atema sangdong tasentem agütsüogogo aser iba nung Indigenous Inhabitant Certificates (IIC) angutsü telatbatem agüja lir ta Dr. Rio-i ashi.

RIIN maparen nung sobaliba rejutemi tongti shilem agitsü aser Village Councils-i Village Verification Committees ajanga lisopur jangjatsü tebilemstü khuret agütsüogogo ta paisa ashi.

Anungji sorkar ketdangsubaren nung sobaliba

nungi benshia aruba ketdangsubaren kanga tongtipang anungji Deputy Commissioner temi Village aser Tribal Councils den tesentaktep tajung yur inyaktsüla ta Dr. Rio-isa ayongzük.

"India nung mezüing atema fully digital census ji Census-2027 asütsü aser iba nung mobile-based data collection aser self-enumeration bendenloker. Nagaland nung Census ya shilem ana lemsar inyaktsü- July 1 nungi 30, 2026 tashi Houselisting aser 2027 tetenzüklen Population Enumeration agitsü" ta CM Dr. Rio-i ashi.

Tesüiba census maparen nung nütsüing yongsük meputep agüka liasü aser iba ajanga planning aser resource allocation nung kongshiogo. Anungji Deputy Commissioner temi Principal Census Officers ama Census ya tashishitsü melii, shitak aser tejangja yanglutsüla ta paisa ashi.

CM Dr. Rio-isa Inner Line Permit (ILP), Bengal Eastern Frontier Regulation (BEFR), aser Frontier Nagaland Territorial Authority (FNATA) indang onüktem benoka lemsatop.

"Commissioner, Nagaland lenisüba kübok mapang shia Deputy Commissioner tem

sendentem mena arur aser teimba district administration aser law and order nung dang temulung agütsür. Ajisüaka Census maparen inyaktsü aliba agi anogo ana mungdang amungtsü lemtet" ta Chief Secretary, Sentianger Imchen, IAS-i ashi.

"Deputy Commissioner temi law and order, elections aser census maparen dak alia district level nung Centrally Sponsored Schemes aser state sorkar maparen inyakba ketdangsuba repringer" ta pai ashi.

"Maneni Deputy Commissioner temi Chief Minister's Micro Finance Initiative aser Nagaland Skill and Entrepreneurship Development Mission amala maparen nung mendenpur ama shilem agir" ta Sentianger-isa metetdaksü.

"Iba mungdang nung Additional Deputy Commissioners dendaktsür kechiyong nenoki Urban Local Bodies nung Chief Executive Officers ama inyaker aser talisa solid waste management amala rongdak onüktem lemsateptsü atema nenok dendaktsür" ta paisa ashi.

Iba sentong nung Commissioner Nagaland Gregory Thejawelie, IAS-i anküp tepela o jembi.

New Delhi nung National Public Relations Summit-2026 agir

Dimapur, April 10, 2026 (TYO): April 9, 2026 nü New Delhi nung 'Communicate, Connect and Convert' omen nung ajemdaker National Public Relations Summit-2026 tenzükogo.

Government of Maharashtra, Directorate General of Information and Public Relations (DGIPR)-i tang agi tasembenbuba National Public Relations Summit ayonga agir. Iba sentong ya state tem tsüingda angazükteptsü aser linük nung public relations tajung aliba sayutsü atema agir.

Iba Summit tenzükba sentong nung Commissioner, DIPR, Karnataka Hemanth Nimbalkar, IPS-i o jembidang Department of Information & Public Relations (DIPR) ajanga sorkar ketdangsubaren nung tongti shilem agiba indang lemsatop.

"Tesüiba nung misinformation mesüra disinformation ajanga sorkartem loksago. DIPR ya sorkar ketdangsubaren aser sorkar asoshi tenük lir aser State Information & Public Relations aser Intelligence Department nung 99% tashi Chief Minister

indang ministerial portfolio nung dena lir" ta Hemanth Nimbalkar-i ashi.

"DIPR ajanga sorkar osangtem aser advertisements prokshir anungji department-i information & public relations dang masü saka intelligence maparen ajungketsüla. Tesüiba küm 10 tashi sorkar atema koma osang prokshitsü ta süoki ia bilem saka tangbo 'truth management' mapang lir" ta Hemanth-isa ashi.

Asenoki mapang shitak nung mezüing ochi prokshitsüla saka tetsükdaktsü ajurudang sorkari social media teyari agitsüla ta paisa ashi.

"Maharashtra Information Centre, New Delhi-i iba summit ayongzükba aser media management o public relations atema AI solutions prokshiba atema tenüngsang agütsür" ta Shweta Singhal, IAS, Special Commissioner, Maharashtra Sadan-ia ashi.

Iba sentong nung Nagaland IPR Department tenüng nungi Deputy Director & Senior PRO, New Delhi, IPR, Government of Nagaland, Kuolie Mere-i shilem agir.

ECI-i polling station ka nung re-poll asütsü tuyur

Dimapur, April 10, 2026 (TYO): April 9, 2026 nü Assam, Kerala aser Puducherry Assembly elections den ano Karnataka, Nagaland aser Tripura nung by-elections agiba sülen Election Commission of India (ECI)-i polling station ka nung re-poll asütsü tetuyuba agütsüogogo.

April 10, 2026 nü Assembly Constituencies (ACs) 296 den külemi Karnataka, Nagaland aser Tripura nung by-elections agiba Assembly Constituency 4 nungi Returning Officers (RO) 296 aser ECI-i shimtetba General Observers (GO) 296 den külemi kulikakettem repringdanga liasü ta Deputy Director P. Pawan-i

angutsüogogo. Iba maparen inyaktsüba ya candidates 1,899 dang jelia anogo, mapang aser tesem indang osang metetdakja liasü aser April 9 nü polling asüba Polling Stations 63,084 nungi ka nung re-poll asütsü lemtet ta Deputy Director-isa metetdaksü.

ECI-i iba re-poll ya April 11, 2026 nü Assam nung 123-Karimganj North Assembly Constituency kübok 239-Babyland High English School polling station nung asütsü tetuyuba agütsüogogo.

Iba re-poll ya booth number 239 nung agitsü aser April 11 anepdang 7:00 ako nungi

sangdong ka nung metetdaksü.

Iba maparen inyaktsüba ya candidates 1,899 dang jelia anogo, mapang aser tesem indang osang metetdakja liasü aser April 9 nü polling asüba Polling Stations 63,084 nungi ka nung re-poll asütsü lemtet ta Deputy Director-isa metetdaksü.

ECI-i iba re-poll ya April 11, 2026 nü Assam nung 123-Karimganj North Assembly Constituency kübok 239-Babyland High English School polling station nung asütsü tetuyuba agütsüogogo.

Iba re-poll ya booth number 239 nung agitsü aser April 11 anepdang 7:00 ako nungi

tenzükter nikongdang 5:00 ako tashi agitsü.

Assam kübok Sribhumi district nung April 9 polling anogo nung BJP aser Congress pusemertem tsüingda raratepa liasü.

Karimganj North nung candidate 14 tashi lir saka parnok rongnung tongti süa toktepbaji BJP candidate Subrata Bhattacharjee, Congress candidate Jakaria Ahmed aser AIUDF candidate Choudhury Hibbur Rasul Usama Mabur nung lir.

Karimganj North nung registered voters 2,59,644 lir aser parnok rongnung tebur 1,32,442 aser tetsür 1,27,201 lir.

Nagaland PWD-i Foothills Road indang osang tai prokshir: NFHRCC

Dimapur, April 10, 2026 (TYO): Public Works Department (PWD)-i Foothills Road mapatong atema administrative approval magütsü ta public tsüingdang tiyazü ashiba anema Nagaland Foothills Road Coordination Committee (NFHRCC)-i kuli sayuogo.

Foothills Road mapatong atema Rs 430.77 crore indang administrative approval agütsüogogo aser iba ya March 15, 2024 nü Additional Secretary,

GoN-i PWD (Roads & Bridges) Chief Engineer dangi zülü ta NFHRCC-i metetdaksü.

Iba approval ya Roads and Bridges Minister-isa pusema nungit aser WBM/WMM stage tashi double-lane Foothills Road yanglutsüba revised estimate atema liasü ta parnokisa ashi.

SASCI kübok Rs 148.50 crore lemozüktsüba kulikakettem lir aser February 12, 2024 nü single-lane road atema Rs 191.38 crore administrative approval

agütsüogogo. Iba sülen March 15, 2024 nü WBM/WMM tashi double lane atema Rs 430.77 crore revised administrative approval agüja liasü ta NFHRCC-isa ashi.

Ajisüaka, Public Works Department (PWD)-i item temelabatem liaka osang tai prokshir aser technical mesüra financial timtem indang ashitsü melena o yanglushir jembir ta Media Cell NFHRCC sangdong ka nung ashi.

Advisor Hekani Jakhalu-i Centre of Excellence ka semzüksü

Dimapur, Rongchii/April 10 (TYO): MLA & Advisor for Industries and Commerce, Nagaland Hekani Jakhalu-i Hokolbarnü Nagaland Tool Room & Training Centre, Dimapur nung Centre of Excellence Industry 4.0 - SRUJAN atsülangshiba ka semzüksüo.

Iba center ya Corporate Social Responsibility (CSR) inyakyim kübok Bharat Forge Ltd-i amenok aser parnok nem SimuSoft Technologies-i technical teyari agüja liasü.

Centre lapokba sentong nung o jembiba mapang Hekani-i, Northeast India nung Nagaland kija nung Industry 4 Centre of Excellence amenoka lir ta ashi. Iba ya lapokba sülen küm ana sülena iba facility ya NE nung Nagaland kija nung lir, koba magishitsüji state atema takoksa tulu asütsü. Laisa, lanurtem dang iba center-i agütsüba maongka ya agütsü ajungshi, koba alima nung industry tem aniba tashi koba technology ya lir iba dak rangloker lir, ta ashi.

State sorkari, iba facility ya lanurtem atema comprehensive

one-stop center ka kümdakja NTTC ya technology tsütsü terenlok atema hub ka kümdaktsütsü asoshi bendanga agütsür aliba nenshia metetdaksüo.

Iba inyakyim nükjidongji luyim balala tesem ka nung dang angazükdaktsütsü, lanurtem nem tarutsü nung state technology tsütsü anidaktsütsü atema tenüngdakba shisatsü agütsütsü atema lir.

Lai, kaketshirtem dang sorkari agütsüba iba maongka ya agia pei tarutsü jenjang yanglutsü aser state rongsenketzüng terenlok nung teyari agütsütsü ajungshi.

Kasa anogo Advisor-i, modernization of classrooms aser hybrid mode 50 KW solar panel infrastructure lapokja liasü.

Sentong nungsa Vice President Human Resources & Head CSR, Bharat Forge Ltd, Dr Leena Deshpande-i ashiba agi, technology tem kija agi sayatenya kecha madokdaktsütetsü, saka technology amshir alitsüla. Facility tasentemi hadirtem agütsür, saka asenoki classroom

nung angazükba tasatem ya employee aser entrepreneur temi career atema amshidaktsütsü asoshi jenjang renemtsütsüla, ta Leena-i ashi.

Kaketshirtem mapa angutsü temelaba kümdaktsütsü atema high-end technology den modern design tem longjemdaktsütsü kodang tongtibang iba indang lai lemsatsep. Laisa, NTTC ya technology atema independent hub ka kümogo aser tarutsü atema renema lir ta ashi.

Lai ashiba agi, Bharat Forge-i Nagaland nung school ana nung lab amenoka technology orientation inyakyim ka tenzükogo.

Maneni sentong nungsa NTTC, Assistant General Manager, Er. Imnayanger Imchen-i ashiba agi, iba centre indang facility yagi NTTC trainee tem dang ajangzükdaktsür masü tangara ajangzükdaktsür. Iba ya state ajunga atema maongka ka lir. Center of excellence ya Nagaland kübok school aser college tem nungi kaketshirtem ajangzükdaktsütsü atema designe süa yangluba lir, ta paisa shisem.

Kohima DPDB senden April 15 nü amentsü

Dimapur, Rongchii/April 10 (TYO): Kohima DC B Henok Buchem, NCS-i sangdong ka ajanga District Planning & Development Board (DPDB), Kohima züngsem ajak dang ita shia amenba DPDB senden April 15 nü 11 ako nungi tenzük

DPDB Conference Hall, Kohima nung amentsü ta metetdaksüo.

Züngsem ajak dang mapang aser anogo ya temulung dang ayutsü aser senden nung jangrabangra arua shilem agütsü mepehia metetdaksüo.

28 Koridang Assembly Constituency election nung amshiba EVM & VVPAT tem rizünga yuogo

Dimapur, Rongchii/April 10 (TYO): 28 Koridang Assembly Constituency atema Bye-election April 9 nü kanga takok ngua agiogo. Iba election nung polling station 30 prongla senteper voter shilem 82.21-i shilem agiogo, ta Office of the Chief Electoral Officer, Nagaland-i metetdaksü.

Chief Electoral Officer, Nagaland, Bhagyashree Banayat, IAS-i sangdong ka ajanga ashiba agi, polling tembangba sülen Electronic Voting Machines (EVMs) aser Voter Verifiable Paper Audit Trail (VVPAT) machine tem ya pei tata strong room tem nung rezünga yuogo.

EVM aser VVPAT machine tem ya Election Commission of India inyakyim dak ajemdaker videography kübok election nung toktepba candidates/parnok representative tem matsüngda rezünga yuogo. Strong room ya two-tier Armed Security (minimum one platoon

of Armed Security Force)-i nüka atatsü aser 24x7 CCTV coverage alitsü. Reserve EVM aser VVPAT tema Commission-i tuyuba ama Reserve Strong Room nung storage aser security protocol tem dak ajemdaker rezünga yuogo.

Election nung toktepba candidate ajak dang strong room idang security arrangement asadangtsü asoshi parnok indang representative tem yoktsü tezüluba nung osang agütsüo. Parnok ya inyakyimtem asadangtsü asoshi inner security perimeter tema nung toktsü aser strong rooms telung reprangtsü asoshi CCTV ajanga tangokba sayua liasü.

Strong room ya vote azüngba anogo election nung toktepba candidate/parnok representative tem aser Election Commission of India-i shimba Central Observer(s) tem matsüngda lapoktsü koba video agia atatsü.

Zhaleo lenisüba nung Chumoukedima DPDB senden menogo

Dimapur, Rongchii/April 10 (TYO): Chumoukedima District Planning and Development Board (DPDB) senden April 10 nü DC conference Hall, Chumoukedima nung menogo. Iba senden ya Advisor Urban Development & Municipal Affairs & Chairman DPDB Zhaleo Rio lenisüba nung agia liasü.

Senden nung jembiba mapang Zhaleo Rio-i, department ajak dang sendaktepa inyaksü aser district terenlok asoshi longjemer inyaksü ayongzükba liasü. Paisa, terenlok maparen balala benoka inyakba mapang nüburtem temeden aser tejangraba teti kümzükba toktsütsüla, ta ashi.

Ketdangsurtem dang tayongzükba balala koktetyonga aotsü asoshi bendanga agüja inyaksü ayongzükba den pai terenlok asoshi department balala

sendaktepa inyaksangshitsü koda tongtibang iba indang lemsatsep aser maparen ajakji tatem nungbo nüburtem tenzüksü atema dang lir ta ashi. Zhaleo-isa, district nung nükjidongtem ataloka aotsü aser sentong tapet yanglutetsü atema DPDB senden nung teti adentsü nüngdakba lemsatapa liasü.

Senden nung National Highways Act, 1956 adopt asütsü atema sensaksema liasü. Ken o dak sendakba nung SDO (Civil) Chumoukedima Chumbenthung Murry-i ashiba agi, India sorkari state sorkar den aiben tongtepratepa arudar aser national highway project tem atema ali mekazüksü ya state mechanism tem ajanga masü saka iba Act kübok provision tem dak ajemdaker inyaksüla.

Pai, Nagaland ya Article 371A agi kümzükba lir asünung

iba ajanga ali kibur, ali rongsen ajak kümzükba lir, anungji iba Act benoktsü atema tekümzükba balala agütsür aliba ya kanga junga asadangtsü nüngdaker, ta ashi. Maneni pai, lokti tentet balala den sensaksemogo aser telemtetba agiba mapang parnok tebilembatema bendenlokogo, ta ashi.

Board-isa, Foothill Road project, New Chumoukedima Village & Razüphema Village atema Right of Way (RoW) sensak asem, aser lokti tentet balala aser school züngoksemtsü atema onüktem densema tanga tongtibang onüktem benoka sensaksema liasü.

Maneni senden nung Economics and Statistics Department-i PowerPoint presentation ka agütsü. Taruba senden nung presentation ka agütsütsü asoshi Police department nem nongloktsüo.

GPRN/NSCN-i metetdaksür

Dimapur, Rongchii/April 10 (TYO): Kilo (Home) Affairs, GPRN/NSCN kübok Crime Control Cell (CCC)-i, Engine No. D4FCKM757387 aser Chassis No. MALC181RLKM553956 keta aliba Hyundai Creta (White Colour) gari ka April 9 nü nguteta parnok ket nung yua lir ta

metetdaksüo.

Anungji kibur dang gari indang kuli kaket tejangja bener arua iba osang agütsüba sülen anogo tenet tsüngda arua gari agizüksü metetdaksüo. Osang tejangjaba agütsü atema iba number: +917629993788 den tongtepratepsü metetdaksüo.

Uttarakhand nung TaFMA partner resort tem atema kentener 5 shim



TaFMA ketdangsurtem aser kentener pongu tangokba noksa nung angur.

Kohima, Rongchii/April 10 (TYO): Espire Hospitality Group kübok Uttarakhand nung TaFMA partner resort tem nung adentsü atema shimba kentener pongu minoktsüba sentong ka Task Force for Music & Arts (TaFMA)-i ayongzükba agiogo.

Iba inyakyim ya Naga nunger kentener tem atema state adena or professional maongka atsülanga aotsü asoshi tongtibang alizüng ka tongtetba asütsü, aser iba ajanga parnok sempet national jenjang nung sayatsü maongka agütsüba den industry nung tangar dena tali metettepa

aotsü, ta TaFMA mendenbuba Theja Meru-i ashi.

Kentener tem rongnung Aloino Shohe (Kohima), Nikiho Kahoto (Dimapur), Mhao Yanthan (Wokha), Kojungli Jingrii (Tuensang) aser Levietholo Koza (Phek) nunger densema lir.

Iba inyakyim ajanga sempet aketba lanurtem anitetsü, kentener nung career yanglutsütsü aser Nagaland aser Nagaland adena or tanga tesemtem nunga lenmang lapokyonga odaktsütsü asoshi TaFMA bendanga agütsür aliba sayur.

Wati Ozüküm-i züluba "Olong Ratet" kaket saya

Mokokchung, Rongchii/April 10 (TYO): Wb. S.Wati Ozüküm-i züluba "Olong Ratet" kaket tanü Ao Riju Conference Hall nung Ao Senden Tir Wb.Marsanen Imsong-i sayatsüo.

2020 küm "Olong Ratet 1001" ta nüngja jar mezüngbuba kaket adok aser iba sülen tazüngertemi iba kaket nungya tagitarutsü jenti lir, anungji ano maneni talila bendenloka zülü nung nübur asoshi tajangzük tulu asütsü ta ajungshiba agi

taoba kaket nung alibatem ano tali tejangjaba nung rajemshia zülushir ano talila 110 inoksemer tang adokba kaket "Olong Ratet" nung 1111 lir ta kaket zülur Wb.S.Wati Ozüküm-i jembidang ashi.

Kaket zülur-isa iba kaket nungya tar nunger otsü dak sentakba tekümdangtsü, tsübur jembia aruba tatishitsü aser teshisadangtsütem, meimchitem nüngtaktem aika bendena zülüo, anungji iba kaket azüngertem tajangzük angutsü

tamang akar ta ashi. Paisa iba kaket ya Arangtet tatidang agütsürtem tenren balala asoshi kanga dang tongtipang kaket ka lir ta metetdaksü.

Iba kaket ya taoba adok nungbo senpak 600/- agi ayok saka iba kaket ya asen nübur ajangzükdaktsütsü tangatetba nung zülü asünung senpak 500 agi dang ayoker aser taruba hopta nungi kaket ayokdak angutsü ta kaket zülur-isa lemsatsep.

(Maneni tapak 8 nung...)

Amit Shah-i West Bengal election atema BJP manifesto saya



April 10, 2026 nü Kolkata nung BJP manifesto sayaba sentong nung Union Home Minister, Amit Shah-i osangbenertem den jembidang tangokba noksa nung angur. Kasa noksa nung Union Minister Sukanta Majumdar (ajichi) aser West Bengal state assembly nung Opposition lenir, Suvendu Adhikari nata angur.

Kolkata, Rongchii/April 10 (Agencies): Hokolbarnü Kolkata nung Union Home Minister, Amit Shah-i, West Bengal nung BJP-i sorkar kümra tetsürtem nem indangindanga bank account nung sen 3,000 inoktsütsü, ta metetdaksü.

Shah-isa, merit nung ajemdaker mapa agütsütsü aser tetsürtem nem sorkar mapa shilem 33 shiteta agütsütsü, ta metetdaksü.

Kolkata nung election nüboyim sentong ka nung Shah-i West Bengal assembly election atema BJP indang 'Sankalp Patra' (election manifesto) sayaogo.

Iba sentong nung jembidang pai, tetsürtem nem indangindanga bank account nung sen inoktsütsü, Singur nung Industrial park ka amenoktsütsü aser ozüng alema lisem shishilembartem anema inyaksü, ta metetdaksü.

Amit Shah-i, "Iba manifesto ya Bengal nung timtemertem ajak timtem nungi anitettsü atema asalentong ka lir. Iba (manifesto) ya ajanga timtem balala ajangshiba aluyimertem nem lenmang tasen lapoktsütsü aser Ato kilonser Narendra Modi-i mangdang ayuba ama terenlok India atema mangdang agütsütsü. Nüburtem tsübur aser jashir. Parnoki temelungjang taroktiba nungi temelenshi aginer. Tanübo onoki Bengal assembly nung tongti opposition party ka ama tenzüker," ta metetdaksü.

Shah-isa, Mamata Banerjee-i aniba TMC sorkar küm 15

yimsüsüba ya West Bengal nüburtem atema pungmang tamajung ka lir, ta ashi.

"Bengali New Year mapang nung onoki item tenanzükba metetdakja nüboyim tenzüker. Gurudev asoba anogomong mapang nung iba (manifesto) ya ajanga tetsübu nungi Bengal anitettsü aser tamang katetba sorkar ka amenoktsü. Küm 15 tashi TMC yimsüsüba ya pungmang tamajung ka ama liasü, iba mapang nung timtem aika ajangshio. Iba Sankalp Patra nung ajemdaker BJP sorkar kübok taruba küm pongu tsüngda state terenlok atema lenmang tasen aika lapoktsütsü," ta pai metetdaksü.

Paisa, Mamata Banerjee-i kümsük (term) asem tsüngda tetsübu, bendanga züngshiba aser ochimashi ajungkettsüogo, ta metetdaksü.

"Tang BJP tenanzükba kübok Bengal-i lenmang tasen bushitsü. Ozüng nung tera-yanga aliba lenmang, nija aser linük security aser mapa anguba lenmang bushitsü, iba denji külemi 'Sonar Bangla' yangertsü," ta Shah-i metetdaksü.

Shah-isa, Bengal nung BJP-i sorkar kümra mapa manguba lanurtem nem ita shia sen 3,000 teyari agütsütsü, ta metetdaksü.

BJP election manifesto nungsa, tetsürtem nem sorkar mapa shilem 33 agütsütsü, tetsür temeja police battalions amenoktsü aser tetsürtem kümzüka alitsü atema "Durga Suraksha Sahaya" scheme

tenzüksütsü nangzüka lir.

BJP manifesto nungsa taruba küm pongu tsüngda mapa crore 1 adokdaksütsü, industry sector asenstenshitsütsü, süngo-lu ajungkettsütsü, Darjeeling süngo brand sütsütsü, bosta industry ajungkettsütsü aser PM Matsya Sampada Yojana kübok Bengal ya fisheries tiyongtsü tesem ka kümdaksütsü nangzüker.

Manifesto nungsa ozüng alema lisem shishilembartem anema inyaksü, sen katiba inyakyim anentsütsü, TMC yimsüsüba kübok ochimashi mapatem bushitsü, magütsü aliba Dearness Allowance (DA) agütsütsü aser 7th Pay Commission nangzüka lir.

BJP manifesto nungsa ozüng alema arua aliba bendangertem maitsü jangjatsü, pudentsü aser meindoktsü, Uniform Civil Code (UCC) benoktsü aser kiset shiruru shibelenba anema ozüng tesashi benoktsü nangzüka lir.

Yimtsüngtem nung rongsenkettzüng jenjang ajungkettsütsü atema tsük, alo aser titi tsünüba ajungkettsütsü, Eight Schedule kübok Kurmali aser Rajbanshi oshitem züngoktsü, 'Vande Mataram' museum ka amenoktsütsü, healthcare aser shisaliok ajungkettsütsü nangzüker.

State nung Ayushman Bharat scheme benoktsü, HPV vaccine angati agütsütsü aser mama cancer screening programs benokba den North Bengal nung AIIMS, IIT aser IIM ajungkettsütsü nangzüka lir.

UP nung SIR sülen voters lakh 84 bendenlok

Lucknow, April 10 (Agencies): Uttar Pradesh nung SIR exercise agiba sülen voters tasen lakh 84 bendenlokogo aser tangbo voters ajak senteper crore 13.39 jungogo.

Uttar Pradesh nung Special Intensive Revision (SIR) exercise tembangogo aser Hokolbarnü final voters list sangdonga liasü.

Hokolbarnü Lok Bhawan Media Centre nung osangbenertem den jembidang Uttar Pradesh Chief Electoral Officer, Navdeep Rinwa-i, state nung SIR exercise ya yaküm October 27 nü tenzüker aser April 10, 2026 nü tembangogo; iba mapang nungji district 75, assembly constituencies 403 aser polling stations ajak ayimjema liasü, ta metetdaksü.

Anogo 166 tashi SIR exercise agiba mapang nung District Election Officers 75, Electoral Registration Officers 403, Assistant EROs 12,758, BLO Supervisors 18,026 aser Booth Level Officers 1,77,516-i shilem agia liasü.

Iba dak alia yimtenren party balala nungi booth level agents 5,82,877 aser voters crore aikati

amalitepa liasü, ta Rinwa-i metetdaksü.

Rinwa-i, taküm January 26 nü sangdongba draft electoral roll nung voters 12,55,56,025 liasü, iba nungji tebur voters crore 6.88, tetsür voters crore 5.67 aser third gender voters 4,119 liasü, ta metetdaksü.

Iba nungji arrshi küm 18-19 pur voters 3,33,981 densema lir, ta pai metetdaksü.

April 10 nü sangdongba final electoral roll nungbo voters ajak senteper 13,39,84,792 lir; iba nungji tebur voters 7,30,71,071, tetsür voters 6,09,09,525 aser third gender voters 4,206 densema lir, ta paisa metetdaksü.

Final voters roll nung tasenpur 84,28,767 bendenlokogo, aser iba nungji tebur voters 42,27,902, tetsür voters 42,00,778 aser third gender voters 87 densema lir.

District tem sasep nung voters teimba bendenlokba district temji Prayagraj (3,29,421), iba sülen Lucknow (2,85,961), Bareilly (2,57,000), Ghaziabad (2,43,666) aser Jaunpur (2,37,590) lir, ta Chief Electoral Officer, Navdeep Rinwa-isa metetdaksü.



April 10, 2026 nü New Delhi nung linük tatong Tir aser Rajya Sabha Chairman, CP Radhakrishnan-i ketdangsüa Bihar Chief Minister, Nitish Kumar nem MP tenanzükba agidaksüadang tangokba noksa nung angur. Kasa noksa nung Union Minister ana- JP Nadda aser Nirmala Sitharaman nata angur.

Ceasefire takok angutsü atema US-i Israel azüoktsüla: CM Omar

Srinagar, April 10 (Agencies): Jammu & Kashmir Chief Minister, Omar Abdullah-i, Middle East nung ceasefire takok angutsü atema United States-i Israel azüoktsüla, ceasefire takok angutsü mesüra raksatsütsüji Israel dak keta lir, ta ashi.

Srinagar nung aliba Sher-i-Kashmir International Convention Centre (SKICC) nung sentong ka tembangba sülen osangbenertem den jembidang Abdullah-i, Israel nung inyaksangshi, talisa Lebanon maneni amakba atema teblemstü akar, ta ashi.

"Ceasefire ya tamakok ngura ibaji Iran tai ajanga masütsü, saka ibaji Israel tai ajanga asütsü. US-i Israel ya azüoktsüla," ta pai ashi.

Iba rara ya Iran-i tenzüker masü saka Iran anema apusoba rara lir, ta pai ashi.

National Conference lenir aser Chief Minister-isa US Tir Donald Trump-i jembiba otem aija, "Pai anepdang o ka jembir, anüngdang ano tanga o ka jembir aser nikongdangbo ano o balaka jembir. Pai jembiba otemji Tir kati jembiba memesük," ta ashi.

Iba rara tenzüker nukjidong tejangja maliasü ta shia Abdullah-i, "Rara metenzükdang iba rara tenzüker nukjidong tama jangjatsüla liasü," ta ashi.

Paisa, India aser Israel na tesendaktep junga aliba agi India-i yimtenren tsütsü inyaksangshitsü atema lenmang mesü-a aküm, ta ashi.

"Israel-i dang iba rara nüngdaka liasü. Asenoki Israel den tesendaktep kanga junga mayu asübo Pakistan-i shilem tajung agiba amaji India-ia shilem tajung agitetla," ta pai ashi.

AXIS BANK

AXIS Bank Ltd
A.C.Market, 4th Floor, 1, Shakespeare Sarani, Kolkata- 700071

Gold Ornaments auction asütsü atema sangdonger

Talisa sen apurtem aser public dang ya sangdonger, Axis Bank-i tsünglanglen shia aliba Branch nung tsünglanglen shia aliba accounts indang hon agi yangluba osettem public auction asütsü.

Tsünglanglen shia aliba sen apurtemi Axis Bank Limited dang nungi sen apua security atema hon agi yangluba osettem ("Gold Loan Facility") agütsü. Sen apurtem/Guarantors nem Demand notice agüja Gold loan facility agiba sentshü agüjung ta metetdakja liasü. Ajiüsüka sen apurtem/Guarantors-i sentshühji magütsütem nung bank-i hon osettemji auction asütsü, talisa tsünglanglen schedule of property nung shia alibatemi **11-05-2026 anogo nung anüngdang 11:00 ako** nungi "Kong aliar yamaji", "Koma lidir yamaji", "Yangji aliba ajak" aser "No Recourse Basis" nung ayoktsü.

Sen apurtem aser sentshüh osang tejangja:

BRANCH_RAC_NAME	Customer Name	Loan A/c No	Amount Outstanding	Date of Demand Notice	Gross weight grams.	Net weight grams
DIMAPUR [NL]	KABOTO H AYEMI	XXXXXXXXXXXX5723	432278.86	9/Feb/26	68.400	65.600
DIMAPUR [NL]	ABDRESH RAY	XXXXXXXXXXXX9665	138781.85	9/Feb/26	19.900	19.400
DIMAPUR [NL]	T NEYEN PONGNYU	XXXXXXXXXXXX8129	100351.00	9/Mar/26	14.700	14.400

TENDER ATEMATELATETBATEM

Base/Reserve price ji auction anogo nung tender asürtem nem agütsütsü, aser auction bid agizütsü. Bank-i agütsüba prescribed tender form nung aliba bid/offers dang bid asütsü atema agizütsü.

Bid form/tender nung mabensaba/metokmeperi lira ibaji magütsü aser magizütsü.

Tender documents den külemi telatetbatemi temalen agüja aliba branch nungi agizütsüla. Tender document ji jungunga renemba sülen 11-05-2026 nü office mapang nung concerned branch official nem agütsütsüla. Anogo süba sülen agütsüba tenders bo magizütsü. Shia aliba osettemji "Kong aliar yamaji", "Koma lidir yamaji", "Yangji aliba ajak" aser "No Recourse Basis" nung ayoktsü. Shia aliba oset standard, purity mesüra sentshüh aser tax magütsü ali nunga ibaji Bank khuret masütsü.

Auction anogo nung shia aliba mapang nung offers agütsütsü atema tender asürtem lia Bank-i tender lapoktsütsü, inter alia.

Branch tenüng tekalen shia lir. Auction Anogo: 11-05-2026.

Offer/tender kodang agütsüdir ibaji agientsü makok aser bid asürtemi single bid/offer for particular article/asset/ornament atema bid amount agütsütsüla akümtsü. Oset ka/asset/ornament atema bid asürtem ka dang nungi tali lira bid asürtem tsüngda inter-se bidding alitsü aser 'highest bidder' ji takok angur bidder ta züngshitsü.

Bid asürtemi KYC documents ajak i.e. PAN Number, PAN Card, Adhaar Card & Address proof etc agütsütsüla. Bid asürtemi E-mail ID & Contact Number tejangja agütsütsü

Offer agizütsü mesüra magizütsü atema Bank dak temeden lir.

Shia aliba property/ayokba nungi mangatettep kar danga adokra ibaji Mumbai nung aliba jurisdiction of Courts/Tribunals ajanga dang bentetsü.

Anogo : 11.04.2026
Tesem : Kolkata

Authorized Officer,
Axis Bank LTD



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGCHII 11, 2026

Foothill tama, ajiser 4 lane !

Asen kidang - kiyonger Himanta Biswa Sarma aser Conrad Sangma na nembro angashidaksütsüla masü saka asenoki mapa tilakata merenemtet kümä küm ajokshiba ya, shiti kolak per agi menembangtet medem, mimbanga yutetla masüba mapa aika lir saka tongtibang anaji, Dimapur nung küm 20 dak tali agia state stadium tilaka merenemtetba aser mapang shia foothill road meyanglutet ajokshiba mapa ana ya asütsü. Aji oda, asen kidang-kiyonger state nungbo manger sangwa nung sen crore 3000 endoka Brahmaputra ayong temdangba kilometer 1.24 talang aser 6 lane apu ka renemer lapoka sayuogo. Iba denji yimitem nung azüklen flyovers yangluba aser medical college aser stadium-tem zünger mezüngma renema amshia angudang, jet ta asen lima nung state stadium aser foothill ya dang masü saka Dimapur aser Mokochung nung lenmang lendi tatsüka temdanga footbridge yanglutsü apusoba dena merenemteti ayuba mapatemang bilemteter. Aji oda, Nagaland nung ajoksar ayuba item mapatemji repranga Himanta Biswa Sarma aser Conrad Sangma nungertem anir jaja nunga parnokia kechi bilemla aser asenokia parnok dang asenok bolokba otsü ya koma shila ta akseta bilemer. State stadium aser footbridge-tem ajoksar ayubaji khen toktsür, asenok asoshi kangasa tongtibangtiba mapa ka kanga temulung agüja inyaksüsbaji foothill road ya lir. Ajisüaka, iba gari lenmang tilaka ya yanglutsü asoshia Foothill Road Coordination Committee-i anir nübertemi timtem aser nüngsen agia longkak maitra, government-ibo meinyaki anentsü meranger amai dang sayur. Aji oda, foothill road yanglu tenzükba otsü ya reprangdangra, ibai government nung alirtemi nübertem timtem aser nüngdak reprangteta yanglu tenzükba mapa ka masü saka nübertemi longkak aita yanglu tenzükdaksüba lenmangji foothill lenmang ya lir. Iba kasa tia nung, tawa tanü tashi nübertemi khen longkak aiteli, government-i lenmang tatsüka tua oli, ano mapa anener alidang nübertemi khen ola adokli, ano idangji government-i tatsüka inyaka oli ta nübertemi nunga-nunga lenmang metüzükyonga Doyang ayongbo renemer semzükogo. Iba apu renemtsü asoshia Foothill Road Coordination Committee purtem kisüng jajatsü apu temtsür amato, parnok government den aser contractor den nüngsen agia jembia inyakdaksüba asenoki nguogo. Aji oda, tanga foothill road tatsüka atutsü atema parnok Naga nunger contractor ishika nem mapa lema agütsüba rongnunga karibo tang tashi merenemteti ajokshiba asenoki angashir. Ano külen, government nung alir o ji angadagra foothill lenmang ya kodaser tekaraba nung renemtsü ta bilemer masü saka kodaser merenemtsü ta bilema meranger amai reprangteter. Iba ama tangatetba jagi state stadium-a merenemtet tangar nem renemdaksütsü jembiba asenoki angashir. Aji oda, tangarbo Brahmaputra ayong temdanga yangluba apu lenmanga 6 lane yanglur, saka asenok foothill road 2 lane-a yanglupeter, ano 4 lane atema-ang sen meshitsü shisatetba temulungjangji kangasa majung aser temeimtsü maketba mulungjanga ta tangari reprangtettsü. Iba mulungjang nungji mapang shitak nung mapa shitak renemtsü bilemer masü, saka mapa merenem ser sen meshitsüang bilema alitsü. Kasaji, state stadium -a tilaka inyakpeter yuli, sen tera meshilokli, ano tilaka inyakli sen talila meshisemli ta meshiameshia senbo ajak achi saka mapabo merenem ta ser joko tangar nemang renemdaksütsü jembiba asenoki angashir. Atangji, asen state ajangba National Highway aser tang nübertemi kangshia yangludaksüba Foothill road ajak ya asenoki masüngdangyonga India government-i tarutsü nunga ulushia yanglushitsüba, anungji tang atemabo asenok mapaji tang inyakpeter aliba foothill road ya single lane a sang, 2 lane sang jungjunga shitak renemtettsüla. Joko, asenok tangatetba ya sen meshizüka achitsüba masü saka tangari agütsüba sen amshia asenok ajangzüksü asoshi mapa shitak inyaksüba tangatetba asütsü tim. Aji oda, foothill lenmang ama tupeter, ano lenmang tuluba ka asoshi sen meshitsü jembia sayubaji government-i pei nübertem mezüngmeshir asütsü. Ibaji angateta, tangari mezüngmeshi masütsüsa Naga Tribal Hohos aser NFHRCC na temulung ka ser Foothill Road ya tama, tangsa tang, renemadaksütsüla, ajiserbo, atangji, 4 lane indang jembitsüsa adoktsü.

OLEMSABANG

Asen Meküta Mapa Tajung Inyaksü Wadang Aika Lir

L. Kika Pongener

(Yashi adok nungi...)

Sorkar-i nubur asoshi terenlok mapa inyaksü nungdem nung ali tawa wazüka yua aliba; mesura sorkar meyong ki-o-jen dena tepsa-a; mesura atsüngdoka nuburtemi meru-merua pei meyong küma agia atokbaji.... Kodaser temulung ulua agitet (?).... ta jungjunga bushidanga ora....Ashiko, iba mapa nungji sorkar tenzükter tazüngbur kar densema alitsü akok...!!! Sorkar tenzükter tetongzüngpur kar medeni nuburtem kisungi iba mapaji kodaser temulung ulua inyaktettsü aser agitettsü (?) Iba nungji teshisadangtsü kar lir ta bilemer. Manganutsü mali.... Asen Naga nunger mapa aika nung...."Nabong nem Bati-o (Tamol Pata) lu nuka yutsüba.... Nabong-la jagi-ang Bati-o ajakji mejakmar aliba amai dang asür ". Aji oda, ibala mesukba aibelenba mapatem ajunga teraji jungjunga bushidanga ora; nubur tai tuluba masü; saka sorkar tai tuluba asütsü. Kechiyong ibala mesukba mapatem ajak nungji sorkar tenzükter tetongzüngpur kar dener inyakba asütsü akok. Anungji asen lima nung mapa tajung inyakdi ta bilemra.... tamasa sorkar inyakyim melenshitsüla....iba sulenji asenok nübertem melenshitsüla.

Ano Nagaland Liquor Total Prohibition (NLTP) Act; iba ya Tsüngrem lartem aika nüktzü jenti lalua lumiba aser tamanger nübur merijang aikati lumia akhangba agi ozüng küma laleta ayuba. Asen Naga nunger aiur-asangur, kijung lanur aser nisung tain dena aika yi agi taküm raksa-a aliba; yi agi kibong aika balalula-a aliba aser asen lima lokti temenen (Social evils) agi tesempatsüka menena aliba; iba NLTP Act ozüng yagi azüoker kanga agi tajungba aküm. Ajisuaka, tang Dimapur jila nungpo iba ozüngji mayutsü indang lokti-tentet (NGO) kari aser lokti lenir (Stake holders) kari tongpo apua jembiba aser merangba angudang kanga sasar. Tamanger tajung aika nuktsü lalua lumia sarasadema kanga meranga mapa tajung inyaka yua akaba....Sen (Revenue) angutsüba dak rangloker mapa tamajung; nuburi maginuba mapa inyaksü sentong atongba angudang; tamanger tajung aika temulung kanga shiranger. Nubur karibo NLTP Act tamakok indang kanga jembir....Sürabangla, ibaji shirnok tamakok asütsü (?) Nübur tamakok asü sorkar tamakok asütsü (?) Ozüng yanglur (Law-maker) -ji nübur asü sorkar asütsü (?) Alima ya sen kisung agi meyaglur. Alima renloktsü aser nubur ajangzüksü atema sen nüngdaker; saka alima menentsü aser nubur taküm raksatsü atemabo sen-ji menungdaker. Anungji lokti-tentet aser lokti lennir ajaki nubur taginuba ola angatsüla aser asen lima aser nubur meima mapa tajung inyaksü merangtsüla.

Anungji yimsusurtemi anir lokti-tentet balala lennir ajaki aser nütsüng-nübur ajaki; asen meküta aliba tesem ajak nung mapa tajung inyakdi. Asen meküta lenmang nung kilentsü maliba ajanga lenmang raksa-a lira.... Asenoki asen meyong ali tilaka angadi tenla agüja kilentsü (Nala) yangludaksüdi. Lenmang mesadem mesu-mesur asüba agi yimer, sector-pur, colony-pur timtema lira; aseni asen meyong ali tilaka angadi tenla agüja sadem-sadema yangludaksüdi. Sorkar-i ali tawa nubur asoshi terenlok mapa inyaksü wazüka yua lira; asenoki kümzüka yudi aser meru-merua atsünga magili. Yim lenmang, sector road, colony road anasa shiruru metsüba ki aser latrine ongken meyagluli; kechiyung ibajagi nübur tesenzü majung teshinem menemtsü ta metetdi. Yim lendi aser nubur atenshidak tesem nung jana-ona, plastic-mica, kakat tamajung, süjen-süra, chewing-gum talep, metai talep, cigerrete pongdang, sada pongdang, sali-metsü mashi-mashi endokba ya melenshidi. Ano tenla kidang chewing gum talep, metai talep, takü-tasen-jang mashi-mashi endokba ya-a melenshidi. Aji oda, asenoki tanga mapa tajung aika awaloka meinyak-aka; tang shiyunga aruba mapatemji danga mapa küma inyaksü merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristantemi Lebanon linük-a ceasefire nung züngoktsü mepishir



March 09, 2026 nü Israel-i Lebanon yimtiba, Beirut amakba sülen tangokba noksa nung angur.

April 10, 2026: Khristan organisation aikati, US aser Iran na tsünga ceasefire liaka Lebanon linük nung rara manener, anungji ceasefire nung Lebanon-a züngoktsüla, ta akhangar.

Tan hopta tetenzüklen US aser Iran nati hopta ana ceasefire sangdongogo.

US ser Iran na tsünga rara anenogo, ajisüaka Israel sepaitemi Lebanon maneni amaker.

Bodhbar nikongdang 2:00 ako nunga Israel-i anünglen nungi Lebanon yimtiba, Beirut amak.

Lebanon Health Ministry-i, iba tatalokba nung nisung 182 süogo aser 890 yirugogo, ta metetdaksü.

Iran-ibo, Israel-i Lebanon amakba ya ceasefire tezüngzüktep alema lir ta aitsür, ajisüaka US aser Israel natibo, ceasefire nungji Lebanon densema mali, ta metetdaksü.

Khristan melungtet teloktem-Tearfund, Christian Aid, World

Council of Churches (WCC) aser Middle East Council of Churches (MECC)-i Israel-i Lebanon maneni amakba aitsüogo.

Lebanon & Syria atema Tearfund Director, Jaime Abraham-i, Lebanon nung Khristantem amakba ajanga osettsüset/chiyungtsü nung jenjang kanga tuyogo aser nüburtemi linük toktsür ajentsüsa akümer, ta metetdaksü.

"Tanü anogo ya Lebanon nung alirtem atema mangyimba anogo ka lir, aser Tearfund den partners-ia parnok den külemi mangyimer. Mapang tatsüka tsünga nisungtem takaba ajak samar. Aika tsübur aser teimla samar," ta Abraham-i metetdaksü.

"Hopta ka tsünga Lebanon amakba nung dollar sen billion aika indokogo. Rockets ajanga anogo shia nisung noklang aika taküm samatsür," ta pai metetdaksü.

Christian Aid Middle East

advocacy nung tongti, William Bell-i, "Ceasefire tezüngzüktep nungji Lebanon-a züngoktsüla. Lebanon maneni amaktsü atema Israel nem temelaba magütsütsüla, kechiyong Lebanon nung tai maket nüburtem shilem 25 bo tesem balala nung jenshiogo," ta metetdaksü.

World Council of Churches (WCC) aser Middle East Council of Churches (MECC) natia külem sangdong ka ajanga, Israel-i Lebanon yimtiba, Beirut amakba ajanga security tensa ano tamajungba kümdaksür, ta shia aitsü.

WCC aser MECC natisa telok ajak dang tangsa rara ajak anentsü aser International oziung den meimchir temeden balala akhümtsübuttsü ayongzüik.

WCC aser WECC natisa tai maket nüburtem kümzüksü aser takoksa angurtem/timtemertem nem teyari balala agütsütsü atema lenmang lapoktsütsüla, ta metetdaksü.

Taküm Nigeria nung Khristan 1,400 tepsetogo: Intersociety

April 10, 2026: Taküm küm tenzüker tang tashi nung Nigeria nung Khristan 1,402 tepsetogo, ta International Society for Civil Liberties and Rule of Law (Intersociety)-i metetdaksü.

Taküm January 1 anogo nungi tenzüka April 6, 2026 anogo tashi nung (New Year nungi Easter Monday) tashi nung Nigeria nung telok balalai Khristan 1,402 tepsetogo.

Intersociety-isa, kasa mapang nungjisa Khristan 1,800 puer ao aser iba nungjagi 180 bo tepsetogo, ta metetdaksü.

"Khristan 1,000 apuba shia nungi 100 bo meyipa marur," ta Intersociety chairman, Emeka Umeagbalasi-i metetdaksü.

Linük tesem balala nung Khristantem kanga amaker aser iba tensa ya tamajungba dang akümer, ta Umeagbalasi-isa metetdaksü.

Talisa Temeshi hopta (Palm Sunday-Easter) mapang nung

Khristan 100 dak tali tepset aser iba nungji Easter Sunday kija nung Khristan 34 tepsetba densema lir, ta parnoki metetdaksü.

Easter Sunday anogo nung Benue state nung Khristan 17 aser Kaduna state nung Khristan 15 tepseta liasü, ta kasa osang ajanga metetdaksü. March 30 nü Borno state kübok Kautikari yimdak nunga Khristan 21 tepseta liasü aser Palm Sunday nü Plateau State kübok Jos anasa Khristan 40 dak tali tepset.

Umeagbalasi-i ashiba agi, telok balalai puer aoba Khristantemji aika yiruba zübo agi asür, mesüra reshikangshia tepseter.

Umeagbalasi-i, Nigeria nung ketdangsertemi oziung alema inyakertem menokdangtetba dang masü saka iba ya linük nung Khristan samatsütsü nükjidong nung masü ta ashir, ta metetdaksü.

Sorkar ketdangsertemi, iba ya Khristantem samatsütsü nükjidong nung inyakba masü saka Khristan aluyimertem aser shiruru mesür Muslim nungertem tsünga rara dang lir ta ashir.

U m e a g b a l a s i - i , ketdangsertemi oziung alema inyakertem menokdangtetba ajanga tensa tamajungba dang akümer, ta metetdaksü.

Edo state kübok Benin anasa Home for the Needy Foundation-i Internally displaced persons (IDPs) 4,513 jenokdakja yaridar, aser parnok teimbaka Borno, Southern Kaduna, Adamawa, Niger, Plateau aser Benue state tem nungi jenshiba Khristantem lir, ta pai metetdaksü.

Umeagbalasi-isa iba foundation aser iba foundation tentetsang Pastor Solomon Folorunsho nem tenüngsang agütsü.

ANOGO ABEN TSÜNGREM DEN

Shimtsü Nüji

"Aser Kibuba Tanela lir, aser kechi nung Kibuba Tanela lir, idakji nüjiba lir"

(2 Kor. 3: 17)

Tanela agi sünga jajabaji temelaba agütsüba mesüra oziungyim benshiba masü, saka nüji. Pauli ashi, "Pai tasen tezüngzüktepba tenzüker akümtsü onok peridaksür; ibaji tezüluba oziung masü.. .kechi nung Kibuba Tanela lir, idakji nüjiba lir" (2 Kor. 3:6,7).

Asenok Tsüngrem den lungjemba agi anguba senti rongsen tajungtibaji Khrista nung nüji angubaji lir. Kibuba Tanela ne dak ali nung taküm alitsü asoshi shimtsübaji na nüji lir. Na tamalen aliba taküm ama shi nung mejajatsü ajungshir. Mesüra tanela nung jajatsü majungshir. Tanela-i mulungba ama mesüra shii mulungba ama jajatsü na nüji lir.

Tanela mulungba ama jajaba nung mapa ana keta lir. Mezüngbuba, ibai ola madoki alitsüba masü. Asenoki Tanela nung jajaba indang jembir, mena alitsü indang masü. Ne tanela ainba nung lendong tulutibaji aser teraksa adokdaksübaji ola madoki alibaji lir. Ne mulungjang tetsünga ka nung alibaji lir. Tsüngrem-i mulungba inyaktsü asoshi mener atabaji tanela nung aintsü asoshi Tsüngremer lenmang masü.

Tanabuba nung, asenoki tanela nung jajatsü jembir, asemtsüba masü. Tanela nung sünga aliba takümüji tanela maka aniseta inyakba agi mangur. Meranga inyakba jagi Tanela agi sünga akümer ta asenoki aibelena bilemer. Ibaji tekolok mapa lir. Na jakla (immoral) mejungi kümdaksüba ajanga Tsüngrem tenzüka anendaktsütsü makoktsü akok ta Satani bilemtsü akok, saka nü mapa nung na kanga mazüngi yutsüba ajanga na akoktsü.

Kibuba, tanü Ne mera nung Tanelai mulungba ama ni jajatsü kü dang yariang.

Yaküm UK nung anogo shia Arogo anema inyakba tatalokba 10 liasü

April 10, 2026: Yaküm UK nung Tenla kitem aser Arogo meyong kiojentem anema inyakba tatalokba meyrjang aika liasü, ta Countryside Alliance teloki metetdaksü.

Yaküm January 1 nungi tenzüka December 31 anogo tashi nung Tenla ki mesüra Arogo meyong kiojen nungi Auyaba, raksatsüba, bensatsüba aser Khristantem anema inyakba tatalokba 3,637 liasü, iba dak alia oziung alema inyakba tatalokba 172 liasü, aser ajakji senteperbo tatalokba 3,809 liasü, ta parnoki metetdaksü.

Tenla kitem mesüra Arogo kiojen nungi auyaba tatalokba 1,619 liasü, Tenla ki mesüra Arogo kiojen raksatsüba mesüra rongdoktsüba tatalokba 1,018 liasü, iba dak alia Khristantem anema inyakba

tatalokba 1,000 liasü.

Ibaji lemtsüra anogo shia UK nung Arogojem anema inyakba tatalokba 10 shi lir.

Item osang ya UK nung territorial police forces 45 dang mepishiba nungi 37-i telangzüba agütsüba osang bendena renem. The Countryside Alliance-i, Thames Valley Police, Derbyshire Police, Cheshire Police, Avon & Somerset Police, Durham Police, Hampshire & Isle of Wight Police aser Police Scotland-ibo onoki mepishiaka osang kecha magütsü, ta metetdaksü.

Countryside Alliance nung External Affairs Director, Mo Metcalf-Fisher-i, "Linük tesem ajaklen Tenla kitem aser tekülem kitemi timtem ajangshir, kechiyong oziung alema inyakertem Tenla ki raksatsür aser auyar," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Wasang

(adj) telok ka nung mezüngbuba jenjang (top most position)
* Meranga inyaker teloki wasang jenjang nguteter .

Wasangla

(adj) tetsür tesashi aser tewarak (harridan, aggressive woman)
* Wasangla ama tetsüri lokti nung rongrong adokdaksür.

OLONG PAITEP # 7470

1		2				3			4	
								5		
6										
					7					
		8								
								9		
	10			11						12
	13									
						14				
15										
			16							

TIPIEN

- 2. Kümli tajung / Tejembinü - (6)
- 5. Te ___ en - (3)
- 6. Aou tapu ka - (5)
- 7. Injang agi asü - (5)
- 8. Temola tejaklen - (5)
- 11. Langtem - (5)
- 13. Süngdong tatembang - (5)
- 14. Tebang nungi tangu odaktsü - (5)
- 15. T ___ msa - (3)
- 16. Am agi yangluba - (6)

LANGTSÜNGLEN

- 1. Nüji masü - (5)
- 2. Anügdang - (6)
- 3. A _____ g - (5)
- 4. Aika - (5)
- 7. Tezülen - (5)
- 9. O bendangdak - (6)
- 10. Menütsü / Lutsü - (5)
- 11. Teka amtep - (5)
- 12. Tango asüket - (5)

OLONG PAITEP # 7469 TELANGZÜBA

TIPIEN :

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

NAI-A YA METETTER MA



Brazilian bowler Laura Cardoso-i T20 international nung putiotsü ka yangluogo. Botswana nung Kalahari Women's T20I tournament nung Brazil aser Lesotho tsüngda asayadang Cardoso-i wickets 9 agia Brazil tsürtemi 189 runs agi takok angu. Cardoso-i overs 3 dang aon aser ball 18 nungi wickets 9 tashi agiteta liasü.

HAPPY BIRTHDAY

Jabaso Imliyanger (Ungma) küm ka tashi Tsüngremi anema den külemi arishi moatsüba asoshi tenüng asanger. Jabaso maneni asrishi talang moajangma.

Temeim Otsü, Obu, Oja, Oba, tanutsü aser oko.



Retired HC Judge Katakya-i ozüng alema nakmati atudak semdang



Shillong, April 10, 2026
(Agencies): Retired High Court judge, B.R. Katakya-i West Khasi Hills aser Garo Hills nung nakmati atuba tesemtem reprangdanga senzüogo.

Meghalaya nung ozüng alema nakmati atuba aser shibelenba aziokba maparen meyipa reprangshitsü atema B.R. Katakya-i tesem balala sema senzüogo.

Iba mapang pai Smart Coal

Gates, transport check posts, aser coal loading systems reprangdanga liasü.

Katakya-i West Khasi Hills kübok Hatiabari nung tesem kar semdang aser on-ground assessment agia liasü. Idangji pai Directorate of Mineral Resources (DMR) ktdangsurtem dang monitoring systems aser enforcement metokmeperi reprangshitsü tetuyuba agütsü.

North Garo Hills nung Katakya-i Sarangma nung Smart Coal Gates aser transport check posts reprangdang. Paisa coal loading point tongtipang Mendipathar Railway Station semdang inyakyim meyipa reprangshi.

North Garo Hills Deputy Commissioner office nung pai senden ka ayonga amen aser idangji Garo Hills region nungi Deputy Commissioner aser Superintendent of Police tem aden.

Iba sülen Baghmara, Williamnagar, aser North Garo Hills nungi district administrations den külem senden ka amen.

Ozüng alema nakmati atuba dak sendakba maparen noktangtsü asoshi maparen akangshitsü aser ktdangsurtemi teti tenük yoka mittsüla ta Katakya-i tetuyuba agütsüogo.

Lawngtlai district-i küm 3 drug-free campaign tenzüker

Aizawl, April 10, 2026
(Agencies): Mizoram kübok Lawngtlai district administration-i küm asem atema 'drug-free campaign' ka tenzüko.

Arrtsülen aliba district nung drug amshiba azioktsü atema parnoki Nasha Mukta Bharat Abhiyaan kübok iba campaign tenzüker.

Lawngtlai nung Lai Autonomous District Council (LADC) Chief Executive

Member C Lalsawmzuala-i maparen tenzüksü.

Lawngtlai district ya Myanmar den arrtsütepa lir aser iba district kübok yimtsüng 178 nung iba campaign agitsü.

District-i arrtsütepa aliba ajanga drug kanga shibelener aser iba ajanga azioktsü nung timtem aika ajurur ta Lalsawmzuala-i ashi.

Lawngtlai district-i drug-free status angutsü atema

merangtsüla aser iba nung government agencies, village councils, NGOs aser arogotem külemi yariteptsü nüngdaker ta paisa metetdaksü.

"Iba campaign kübok committee aika tentetogo aser Centre nungi senotsü nguogo" ta Lawngtlai Deputy Commissioner Donny Lalruatsanga-ia ashi.

Mizoram-i Myanmar kübok Chin state den kilometre 510 agi arrtsüa lir.

Manipur sorkari district 5 nung mobile internet maneni shibanger

Imphal, April 10, 2026
(Agencies): Manipur sorkari district pungu nung mobile internet aser data services khen atema shibanga ayutsü metetdaksüogo.

Taruba anogo ananü atema VPN services dena mobile internet aser data services shibangtsü aser iba ya law & order tensa majungba ajanga lir ta sorkari ashi.

April 10, 2026 nikongdang 2:00 ako nungi Imphal West, Imphal East, Thoubal, Kakching, aser Bishnupur nung iba tenokdangba atsülanger ta Home Department-i ashi.

WhatsApp, Facebook, Instagram, aser X amala social media sabangtem ajanga tiyazü osang aser olulu prokshir aser iba ajanga nisung telok adenshir aser ozüng alema mapa inyaker

ta state sorkari ashi.

Manipur sorkari April 7, 2026 nikongdang 2:00 ako nungi tenzüka anogo asemnü internet services shibangtsü metetdakja liasü. Iba sülen April 8 nü broadband services talisa Internet Leased Line (ILL) aser Fiber to the Home (FTTH) connections amala talenba kar lia lapoktsü saka mobile internet tenokdangbabo magien.



Manipur nung police ket nungi prangpong rakzüksü merangba aser curfew alema inyaksangshiba atema nisung 6 apuba sülen agiba noksa ka angur. Parnok ya Yangoijam Borish Singh (23), Mangsatabam David Singh (21), Pangambam Nivash Meitei (22), Laitonjam Roman Singh (22), Phairenjam Tony (21), aser Ningthoujam Denish Singh (22) nunger ta jangjaogo. Bishnupur district nung bomb pokdaksüba sülen curfew ozüng agüja lir saka April 9, 2026 nü Ahallup Makha Leikai nung parnoki sepaitem dak teka sangshi aser parnok ket nungi prangpong rakzüksü merang.

Myanmar: Min Aung Hlaing tir atema tenangzüktepba agiogo



Naypyidaw, Rongchii/April 10 (Agencies): Myanmar nung coup lenir General Min Aung Hlaing, linük tir mapa abentsü atema tenangzüktepba agiogo. Civilian sorkar atsüngtokba sülen kum pongu lir tang pa tir mendeni tuogo. Hokolbarnü linük yimtiba Naypyidaw nung tir atema tenangzüktepba agiba sülen o jembiba mapang pai, "Myanmar ya democracy lenmangi meyipa aruogo aser tarutsü tajungba ka leni odar," ta ashiba den linük tetsükdaktsü aika ajangshia aotsü lir ta shisem.

Min Aung Hlaing ya taoba hopta pro-military parliament-i tir asütsü shim. Pa ya iba mapa atema nominate asüba candidate asem rongnung ka liasü. Pa den tokteper ana ya tatong tir kumogo.

Arishi kum 69 tain general

yagi anir 2021 kum Aung San Suu Kyi-i aniba sorkar atsüngtok, aser la sota ayu aser iba ajanga linük ajunga mesüngjemteti kuma azütokshi lendong tulu ataloka liasü.

Military-i sorkar atsüngba sülen nüburtemi sorkar anema inyaksangshi tenzük aser anti-coup armed teloktem tentet, koba military-i tashiyim agi azüoktsü meranga liasü. Iba tatalokba sülen Myanmar ya Association of Southeast Asian Nations (ASEAN) nungi suspend süja liasü.

Hokolbarnü jembiba mapang Min Aung Hlaing-i, parnoki international tesendaktep yanglushitsü aser ASEAN dena taoba mapang ama tesendaktep yanglushitsü merangtsü, ta ashi.

Hokolbarnü tenangzüktepba agiba sentong nung China, India

aser Thailand ta kidanger linüktem aser tanga linük 20 nungi lenirtemi shilem agia liasü, ta AFP news agency-i metetdaktsü.

Ajisüaka military-i pusemba party-i election koka Min Aung Hlaing tir akümba ya alima kintem aikati magizüker. Kechiyong election nung parnok anema nokdakertem metoktepdaktsü aser telungpurtemi azüoker aliba tesemtem nungbo election ya magi-i liasü.

Linük kum pongu tashi civil war nung aruba sülen International Conflict Monitor (ACLED)-i ashiba agi, iba rara nung nisung 96,000 dak tema tepsetogo. Ano United Nations-ia, 2021 kum nungi tang tashi nung nisung million 3.6 pei talidak ki toktsür jenshia aoba osang agütsüogo.

Russia aser Ukraine na ghonda 32 asoshi ceasefire ka benoktsü

Moscow, Rongchii/April 10 (Agencies): Russia tir Vladimir Putin-i, Orthodox Easter atema ghonda 32 ceasefire benoktsü sangdongogo, aser tir Volodymyr Zelenskyy-ia Ukraine-i iba ya akümtsübuttsü ta shiogo.


Kremlin-i Brestibarnü sangdong ka ajanga ashiba agi, rara ya Honibarnü Moscow mapang nikongtsütsü 4 ako nungi tenzüktsü aser Deobarnü ayaterem tashi benoktsü; iba mapang linük anaprongla nung Easter benjung amungtsü lir.

Kremlin-isa, Defence Minister Andrei Belousov-i Chief of the General Staff Valery Gerasimov dang iba mapang military inyakyimtem anena atatsü asoshi tetutyuba agütsüogo. Ajisüaka Russia nung sepaitem renema dang alitsü, ta parnokisa shimsem.

Zelenskyy-i, Ukraine-ia rara anena atatsü asoshi benokatokogo aser jembiba ama inyaksü, ta shiogo.

"Ukraine-i jenjang agitsü atema renema lir ta aiben shiogo. Onoki takum Easter holiday mapang ceasefire benoktsü shidangogo aser iba dak ajemdaker onokia jenjang agitsü," ta pai Telegram nung zülutsü.

Iba osang sangdongba sülen ghonda ishika lir Dnipropetrovsk tesem



Vladimir Putin

governor-i ashiba agi, Russia-i artillery aser anung ajanga amakba mapang nisung ana süogo.

"Tsükchirtemi district asem drone aser artillery amshia 30 ben shi maka liasü," ta Oleksandr Ganzha-i Hokolbarnü Telegram ajanga ashi.

Rara tembangdaktsütsü atema sensaksem bangdaker aliba mapang ka nung tang ceasefire ya benokogo.

Kremlin otongdar Dmitry Peskov-i ashiba agi, Easter mapang rara anena atatsü asoshi Moscow-i United States den jelia sensak masem, mesüra telok asem sensaksem ya tenzükshitsü atema kecha temaitsü magütsü.

Linük ana tsüngda maneni rara-aka humanitarian channel tembo lapoka lir. Moscow nungi Al Jazeera osangbener Yulia Shapovalova-i ashiba agi, Russia aser Ukraine na tawa sepaitem tasü mang melentepogo.

Ceasefire nung aibelenba atema US-i Iran aitsü

Jerusalem, Rongchii/April 10 (Agencies): U.S. aser Iran na tsüngda hopta ana atema ceasefire benoka aliba nung tetsükdaktsü adoka, yimjung asoshi Pakistan nung sensaksemtsü anogo ka lia Strait of Hormuz lapoktsütsü atema nangzükba ama minyakba atema Hokolbarnü Washington-i Tehran aitsüogo.

Kasa mapang nung Israel-i maneni Lebanon amakba ya Iran-i tenangzüktepba nung aibelen ka ama züingshir.

Iran-i iba strait lapoktsüba kecha temaitsü mali, koba ajanga alima nung energy supply dak sendakba nung tang tetsükdaktsü tulutiba adoker lir. Tehran-i, Israel-i Lebanon maneni amakba ya tongtibang onük ka ama ameter lir. Ceasefire benokba sülen Israel-i Bodhbarnü Lebanon kanga mejungi makogo.

US tir Donald Trump-i Bodhbar aonung social media post ka ajanga ashiba agi, Iran-i strait ajanga totzü bener yoktsü atema jenjang tapet magir. "Iba ya onok mulungtepba ama masü," ta

pa ashia. Tanga post ka nung pai, totzü bener ao tenzüktsü ta ashia, saka US-i kechi jenjang agitsü iba indang osang tejangja magütsü.

Mongolbarnü Trump-i Ceasefire benokba sangdongba sülen mezüngbuba ghonda 24 tsüngda totzü abenba rong ka aser dry bulk carriers pongu dang iba strait ajanga ao, koba ajanga rara metenzük tsüngda alima nung totzü aser liquefied natural gas anogo nung rong 140 oa liasü.

Israel military-i Hokolbarnü ashiba agi parnoki Lebanon nung launcher 10 makogo, kong nungi Brestibarnü nikongtsütsü Israel dak rocket khalokja liasü. Parnokisa, Iran den sendaka aliba Hezbollah telok yagi Israel dak missile ka khaloktsü aser iba ajanga air siren ola agütsütsüsa aküm ta metetdaktsü.

Times of Israel-i ashiba agi, iba missile ya kadangogo. Hezbollah puria, parnoki Haifa yimti nung Israel military infrastructure tem makogo ta metetdaktsü.

U.S. aser Israel nati tang

ceasefire benokba nung Lebanon densema mali ta shiogo. Iran den rara den külemi Israel-i taoba ita nungi Hezbollah pur raktoktsü atema Lebanon maka arudar.

Ajisüaka Iran aser Pakistan nati Lebanon ya iba tenangzüktepba nung shilem ka lir ta shia arudar.

Iran indang Speaker shiba lenisüba nung Pakistan nung Iran nung lenirtem U.S. Vice President JD Vance-i aniba team den sensaksemtsü imlar, pai social media ajanga Lebanon aser tanungba Iran indang "axis" ya ceasefire koba südir süaka ajak nung shilem ka lir ta shiogo.

Iran lenir Ayatollah Mojtaba Khamenei-i Brestibarnü ashiba agi, Iran-i iba rara atema telangzüba tapet agütsütsü.

"Onoki onük linük amakertem memerenshi-i metoktsütsü. Teraksatsüba ajak atema onoki temenok meshitsü," ta pai ashi.

Pakistan teyongtsüi ia hopta ana atema rara anena atatsü asoshi mulungtepba ya Trump-i Iran nem mapang

atazkütsür aliba tembangtsü ghonda ishika lia benoka liasü. Iba tenangzüktepba meyanglu tsüngda Trump-i Iran indang power plants aser aputem raksatsütsü nangzükter liasü.

Kasa mapang nung Pakistan nung ketdangsürtem Honibarnü Iran aser US na yimjung atema sensaksem mezüngbuba shilem atema renemdar. US aser Israel nati February 28 nü nungi Iran amakba ya tembangdaktsütsü nükjidong nung iba sensaksem akar.

Iran-i iba rara tembangdaktsütsü atema Bodhbarnü onük ter benokogo, kong Strait of Hormuz parnoki azüoktsüba, nuclear enrichment dak sendakba nung Iran temeden agizüktsüba, tenokdangba balala agütsür aliba agintsü aser Lebanon nung Hezbollah den rara anentsüba densema lir.

Israel Ato Kilonser Benjamin Netanyahu-i, Israel-i Hezbollah pur maneni amaktsü ta shiogo. Israel sorkari taoba ita Lebanon den indang indang sensaksemtsü atema maongka ka agütsüogo

aser parnokisa Brestibarnü ashiba agi, Netanyahu-i yimjung atema sensaksem takaratiba nung tenzüktsü atema tetuyuba agütsüogo.

"Sensaksem ya Hezbollah pur disarming aser Israel aser Lebanon na yimjung nung tesendaktep tajung yanglutsüba dak rangloker agitsü," ta pai ashi.

Lebanon nung lenir tejen kati Reuters dang ashiba agi, Lebanon-i taoba anogo ishika tsüngda khen atema ceasefire ka benoka atar Israel den maneni sensaksemtsü atema inyaka aruogo, koba U.S.-Iran na ceasefire atema nangzüktepba den kasa asütsü.

Israel nung ketdangsür kati ashiba agi, Lebanon den sensaksem ya taruba hopta Washington nung tenzüktsü imlar.

Hezbollah telok nungi ozüng yanglur kati ashiba agi, par teloki Israel den indang indanga sensak asemtsü memulunger aser Lebanon sorkari sensaksem masü tsüngda ceasefire ka asoshi takhangba agütsütsüla.

Nagaland nung otsüsütsüsa AFI AGM ayonga amentsü



Kohima, Rongchii/April 10 (TYO): Nagaland-i ayongzüka Kohima nung April 13 nungi 16 tashi Athletic Federation of India (AFI) Annual General Meeting (AGM) amentsü.

Osangbenertem den sensaksema mapang AFI Vice President aser Advisor to the Chief Minister of Nagaland Abu Metha-i, iba ya state asoshi otsüsütsü mapang ka ta ashiba den tang mezüngbuba Nagaland nung national sports federation ka indang AGM ayongzüka amentsü lir ta shisem.

Paisa, iba ajanga shinga zütoka metoktsütsü, diversity aser linük telongjem asoshi saisabong ya sabang ka ama amshitsü AFI bendanga agütsür aliba sayur, ta ashi.

AGM ya Hotel Vivor nung amentsü, kong India kübok tesem balala nungi state aser Union Territory tem, sports board, corporate partner, aser private sector stakeholder tem tenüng nung delegate 100 dak temai shilem agitsü imlar.

AFI ketdangsur tejentem den South Asian Athletic Federation aser World Athletics den sendaka aliba international representative temia iba senden nung shilem agitsü imlar.

Bahadur Singh, Anju Bobby George aser Jyotirmoyee Sikdar nunger densema nungtugu asayatemi iba senden nung shilem agitsü.

Seden nung jembitsü aliba onüktem indang jembiba mapang Metha-i, AGM nung policy tongtibangtem sensak asemtsü aser Indian athletics atema lenmang ka mesapoka ayutsü, kong Asian Games, Commonwealth Games, World Championships, aser World Under-20 Championships amala tongtibang asayamungtem atema renemshitsüba densema lir, ta ashi.

Sensaksem ya ano training camp tem, athlete exposure, infrastructure terenlok aser Northeast ya national sports ecosystem-i anioktsüba dak talisa rangloker linük ajunga nung athletics

asaya atsülanga aotsüba dak ajemdaker agitsü.

Paisa, iba ajanga Nagaland ya tangaria meteta akümtsü aser grassroot nung terenlok atema sabang ka agütsütsü, ta ashi. Sentong nung shilem ka ama AFI ketdangsurtemi district-level athletic association tem den sensak asemtsü aser iba ajanga local ketdangsur aser stakeholder tem nem federation aser temaba jenjang nung asayaba asayartem den indang indang sensaksemsü maongka agütsütsü.

Maneni Nagaland aser Northeast atema mejeta sensak asemtsü sentong lir, koba talisa coach, technical official aser event manager tem dak rangloker alitsü. Ano AFI ketdangsur tejen kati Chief Minister aser Angh densema state sorkar den sensaksema state nung saisabong terenlok atema longjemer inyaksü asoshi inyakteptsü imlar.

Metha-isa, iba sentong nongita yariba atema state sorkar dang pelaba lemsatepba den Chief Minister-i AGM ya lapoktsütsü aser Angh-i Raj Bhavan nung delegate tem host asütsü ta ashi.

Maneni Metha-i, Khelo India Tribal Games nung kanga junga shilem agiba atema Nagaland team nem tenüngsang agütsü. Iba asayamung nung Nagaland team-i athletics nung gold ka, silver ka aser bronze medal ka ngua liasü.

Huhtangrü-i Showuba Memorial Open Volleyball Trophy kokogo

Dimapur, Rongchii/April 10 (TYO): 2buba Showuba Memorial Open Volleyball Trophy shibangba sentong April 9 nü Public Ground, Shamator nung kanga takok ngua agiogo.

Iba asayamung ya Shamator District Volleyball Association (SDVA)-i ayongzüka aser yimtsüng balala nungi team tem kanga toktepba asayaogo.

Asayamung shibangba sentong nung alakteta jaokerji MLA aser Nagaland Football Association General Secretary Benie M. Lamthiu liasü aser Pathso Public Organisation tir P. Pokoi-i shilem agiogo.

Sentong ya SDVA tir K. Yaksokiu Yimchunger-i lokti pela agizükba o jembir tenzüik, shibai alakteta jaoker dang kanga pelaba lemsatep, shibai Association maneni nongitba den ajungshia arudar.

Paisa, asür Showuba'er kinungertem dang iba asayamung sponsor asüba atema pelaba lemsatepba den, asayamung nung shilem agiba team tem, ketdangsurtem aser terpranger ajak dang pelaba lemsatep, aser ashiba agi parnok medeni asayamung takok ngua masayatetla.

Alakteta jaoker ama o

jembiba mapang Benie-i, kija aser lokti melenshitsü atema saisabong dak tashi aliba indang lemsatep. Paisa, saisabong ajanga lanur ka taküm nung tazüokba, awareness aser khuret enoktsür aser iba ajanga parnok peisasa dak temulung lemtetba senso tajung ka kümdaktsür, ta ashi. Volleyball asaya indang jembiba mapang pai, iba ajanga lokti tesendaktep akangshidaktsür, kidangertem tali anasabai anir arur aser tesendaktep asüngsashidaktsür, ta ashi.

Iba sentong nung Superintendent of Police, Shamator Suresh Shinde-ia o tatsüka jembia. Pai, volleyball aser taküm na medemdanga jembia liasü. Pai ashiba agi, volley team ka koda takok angutsü atema server, setter, spiker aser defender tem kati ka tangatettep dak metaloker asayar, yamaji taküm nung takok asoshi skill balala, teamwork aser adaptability dak metaloker alir.

Paisa, volleyball yagi asenok dang taküm azüoktsü, angatettepa inyaksangshitsü, tamang kateptsü, kara kara telemtetba agitsü aser tanen

makai inyaksü atema sayur, koba taküm nung takok asoshia tongtibang lir, ta ashi.

Taküm iba asayamung nung district kübok yimtsüng balala nungi team aikati shilem agi parnok sempet aser asayar ka yimya tajung sayuogo.

Final asaya nung Huhtangrü yimtsüng team-i Frontier Legends, Pongrongrü koka taküm iba asayamung benogo.

Asayamung nung jurila sempet agizükertemji: Dungkikhum, Sunny Young Club Tuensang, Best Spiker: Yantsuba, Frontier Legends, Pongrongrü, Best Back: Lato, Frontier Legends, Pongrongrü, Player of the Tournament: Kirito, Huhtangrü Village nunger liasü.

Asayamung shibangba sentong ya General Secretary, SDVA Lato-i tepela o jembiba den SDVA Team Manager Amongba Janger-i ketdangsuä senpet agütsüba mapa agi aser sarasademer tembanga liasü.

Iba asayamung kanga takok ngua asayaba ajanga district nung iba asaya asayatsü jangraba tali küma aoba aser volleyball asaya ajungkettsü atema SDVA bendanga agütsür aliba sayur.

Sorkar school tem nem saisabong dang amshiba oset lemstsü

Kohima, Rongchii/April 10 (TYO): School tem nung saisabong infrastructure akangshitsü aser digital ajanga angazükba ajungkettsü nükjidong nung CSR partners kübok April 10 nü Nagaland nung sorkar school 15 nem asaya dang amshiba osettem aser digital device tem agütsüogo.

Saisabong nung terenlok bener arutsüba den tawa tanü tangazükba nung amshiba hadirtem agüja lenla ajak nung terenlok bener arutsütsü nükjidong nung iba sentong benoka inyakogo.

Sentong nung shilem ka ama sorkar school 60 nem Alexa-enabled device agütsü aser sorkar school 50 nem Cricket set kaka agüja liasü.

Iba den bendenloksema state nung aliba Government High Schools (GHS) aser Government Higher Secondary Schools (GHSS) ajak nem

asaya dang amshiba oset set kaka agütsüogo. Sobaliba asaya aser state nung kanga bulua asayaba asayatem ajungkettsü nükjidong nung item osettem lemstsüogo.

Directorate of School Education Principal Director Shashank Pratap Singh (IAS)-i ashiba agi, kaketshirtem taliba shilem agidaktsütsü, shitemang anema toktsütsü atema ajungmesotsü aser sorkar school tem nung digital inyamyim bendenloktsü nükjidong nung iba jenjang ya agiogo.

Saisabong aser smart learning hadirtem agütsüba ajanga shisaluyim tali tedangshiba kümdaktsütsü imlar, ta pai ashi.

Iba sentong ajanga Department of School Education aser CSR partners na longjemer kaketshirtem ajungkettsü atema jenjang agiba sayur.

STATE OSANG : Tapak 2 nungi...

Wati Ozüküm-i züluba "Olong Ratet" ...



Wb. S.Wati Ozüküm-i (abelen) züluba "Olong Ratet" kaket tanü Ao Riju Conference Hall nung Ao Senden Tir Wb.Marsanen Imsong-i (achichi) sayatsüadang tangokba noksa.

Ao Senden Tir kaket yagi Ao kin asoshi Wb.Marsanen Imsong-i iba milen ka tsükloktsüogo ta Ao Olong Ratet kaket sayatsür Senden tenüng nung Ao kelen mapang tatsüka agia Senden Tir-i tepelaba jembidang alima nung alir metetdakja liasü.

Iba kaket meshiteta tanü lenir S.Wati Ozüküm-i züluba kaket yabo tanga kaket ka ama masü saka asenok meimchir tagitarutsü takzua jembibatem lir ta ashi.

Iba kaket ya ajanga senden lenirtem dena nisung ka taküm azüoka liasü.Wb.S.Wati Ozüküm ya tang Ao Riju nung tongti gitetba kaket ka lira ser iba

BILEMDANGANG
"Nai langka kar maginüra melenshiang; nai memelenshitetra nü tebilemba melenshiang."